

Tsiaku Sudeutsa Sesus tuktsa nanabyitaba napykyryknahatsa bo ziwatahaka

Tsiaku Sesus tukytsa taparaka Sesus humo batu ispirikpo, Sesus inahyryzikpoze ihumo nispirikpobaba. Atahi Sesus soho humo nisispirikpota niyzik, Serusarêhe eze. Kytsa sispirikpobyitsa Sesus tuktsa nisisukyrykynaha iwatsahi sizubarêtsa niwaknaha. Iwaze Tsiaku sibo paikpa ziwatahaka wasania ty nisispirikpoko. Deus hyrikoso ituk niapykyryk iwatahi Deus harere ziwatahaka iwatsahi katsa kino niwatihi wasaniha humo tanymyrky.

1 ¹Uta Tsiaku. Deus tsumuêhĩtsa. Mypehakatsa Sesus tuk tarabaja mykara. Iwatahi ikiahatsa bo piwatahaka. Ikiahatsa Deus tryryktsa Sudeutsa tapara baba dose ikiahatsa nanabyitaba nasiokty ahabo hi piwatahaka.

Ikiahatsa Sesus bo hỹ tsimykaranaha iwatsahi ihumo ahaspirikporêtsa.

²O katukytsa ahadisahawy mopyk zeka ahasukatsihikbyihu ja. Bipyritsa pahasapybyikinaha zeka batu ahasukatsihik. Hawa ha ty mektsatu tsihokdaharêna zeka ahabo zeka batu ahasukatsihik sihumo ahakurêtsa tsimaha ³Mytsatzyiutaha! Hawa tsihokdaharêna mozumu zeka Deus humo ahaspirikporêtsa babatsa tsimoziknaha. Ihumo ahaspirikporêtsa zeka ahapunihikrêtsa tsimoziknaha. Sinini tsimykaranaha zeka ahahyryzikbarasorokrêtsa. ⁴Ahakubyrisorokrêtsa tuze Deus tihi:

— O asahi simysapyrêtsa. Simysapybyitsa ziknakaranaha ana humo hi sisikpybyrêtsa mykaranaha abaka mahani. O asahi sakurêtsa batu siakubyri — my. Sesus tuktsa babatsa tsimaha iwatsatu ahamysapyrêtsa tsimoziknaha. Ahamysapybyitsa tsikykaranaha Deus Sesus humo zahaokzohik. ⁵Ahahyrynymyry byitsa zeka Deus bo tuzapykynaha. Atahi batu tyso:

— O tsiipikyknikinaha batu ahabo nyny my — iwa ba zikmybetsak. Pahaspirikpoko. Pahahyrinymyry tsihikik. Deus bo tsimyzapykykynahaze atahi imysapyrēnikita iwatahi ahabo nyny my h̄y. Iwaze ihumo ahaspirikporētsa babatsa tsimoziknaha. 6-7Iwaze Deus pe tsimaha:

— Tsimymyhyrinymyry katsaktsa Sesus humo mspirikporētsa tsimoziknaha. Iwatsahi batu tyso:

“O mybo nyny my ja tsikaha batu myhyrinymyry”. Aty: “O nawa ha ty myzapykyky Deus kabo nyny my ja” — atakta pihik hyrity waha. Pihik nanabyitaba ihiridawy wa ha zopok humo. Aty Deus humo tsikaeni zuba ispirikpo iwaze pihik ihiridawy hyrity waha.

⁸Aty Deus humo tsikaeni zuba ispirikpo niwatihi paikpa mytsaty mykara. Aba nawa mytsaty mykara. Byriri meky watu mytsaty mykara. Kytsa harere humo meky watu mytsaty mykara. Kytsa paikpa mytsaty mynakaranaha. Asa tihi:

— Deus bo myzapykyky naha zeka mybo baija mybo nyny ziky — maha. Atahi Deus humo tsikaeni zuba ispirikpo iwatahi meky watu mytsaty nikara. Deus humo ispirikpobyita zeka iwatahi Deus batu ibo nyny my.

**Ahatukytsa sinamybyitsa sinamyrētsa kino
niwatihi Deus okzeka atsatu maha.**

⁹Kyze Sesus tukta inamy byizeka tsakurēta! Deus okzeka tsinamyrēta wata atahi iakparawy.

¹⁰Sesus tukta tsinamyrēta inamy mopykbaze niwatihi tsakurēta. Inamy ty okyrysaro waha ¹¹Haramwe naharamwekeze okyrysaro mokoroba tsikzōhanirēna humo nasarotōbaik. Okyrysaro mynapykze batu sapy niy. Okyrysaro aidy hana bo ja. Tsinamyrēta okyrysaro waha. Usta inamy ziaksebaze inamy hana bo ja. Aidy hana bo ja. Iwatahi Sesus tukta tsinamyrēta tsakurēta, Deus okzeka inamybyrita wata iwatahi tsakurēta mykara. Deus ihumo niwatihi iakparawy.

Tsihokdaharēna mozumuze hawa tsimaha.

¹²Katsaktsa sinini tsimykaranaha zeka pykyhytuty tsimaha. Hawa ha ty meky watu tsihokdaharēna tsimykaranahaze Deus harere bo hȳy tsimykaranaha ihumo ahaspirikporētsa h̄y, batu pyk zikaha, ihumo ahaspirikporētsa zuba. Iwatsatu ahakurētsa tsimoziknaha. Iwatuze sinini tsimykaranaha Deus humo ahaspirikporētsa h̄y. Sininikarawy nepykze Deus tihi:

— Ikiahatsa katuk tsinapykyryknaha my. Iwaze hi ikiahatsa bo isapyrēnikia ty nyny my — my. Ikiahatsa ahawahi Deus tuk tsinapykyryknaha. Iwa Deus sinini mykaranahatsa bo my. Asa humo hi tsimypokzitsiarēta. Iwaze sinini mykaranahatsa sakurētsa batu mysisapybyriki.

¹³Deus mybo imysapybara ty batu ziky. Katsa tu tsimymysapybyrikinaha. Deus batu. Iwatahi tsipisapybyrikinahaze batu tyso:

— Deus humo imysapybyiki — iwa batu tyso. Deus nimysapybyriki batu zikaha. Katsa tu tsimymysapybyrikinaha. Deus batu. ¹⁴Katsa zuba tsipisapybyrikinaha. Hawa ha tsimyzihikiknaha mywerykywy wata mozik. Imysapybara tsimyzihikiknaha iwatsahi mysapybyitsa tsimykaranaha. Imysapybara ty tsikykaranaha iwatsahi katsatu tsikmyspihikbatakanaha. ¹⁵Iwaze Deus mype my:

— Ikiahatsa batu katuk ahawahi tsimynapykyryknaha. Nokponi tsimynapykyryknaha ba kanyhytsa — my. Iwaze tsipisapybyrikinahaze Deus tuk ba mywahi tsimysapykyryknaha mybo batu mytyny.

¹⁶O katukytsa ahaty spihikbata spihikbata byitaha!

O Deus mybarawytsa, atahi myzo. Ata hi haramwe nizukni. Byzoje nizukni byrisoiktsa niwatihi nisisukni niy, mybarawy nizukniba. ¹⁷Asa kino moziknaha. Deus batu meky watu zikyzyk. Astatu zuba mynakara. Myzibiyituhukutu imysapyrēnikia ty mybo nyny mynakara. Mynamy ty mybo nynybaik my. Myzibiyituhukutu myhumo tsimpokzitsiarēta. Haramwe hyrity wabyita. Haramwe naharamwebaik isopyk iwaze ebuhuka sukni isopyk. Deus batu. Astatu my.

¹⁸Nimywatawyhik iwaze ityryktsa tsimoziknaha. Iharere bo hỹ tsimykaranaha iwatsahi ihumo mspirikporētsa ityryktsa tsimoziknaha. Iwaze tapara katsa mysapyrētsa tsikykaranaha, anahi nizihikik. Utsa parakbahatsa kino niwatihi simysapyrētsa moziknaha katsa myhumo.

Deus harere tsiwabynahaze iharere bo hỹ tsimahaktsa!

¹⁹— O katukytsa tsiwabytoktonahaktsa! Pyk tohi tahaze tytsasonaha. Aidy waby tsimaha. Aibani zuba tsipakyrikinaha! — iwaze mytsaty tsimaha. Aibani zuba tsinymyrykynaha ²⁰Tsipahakyrikinaha zeka batu ahamysapy. Ikiahatsa tsipahakyrikiknaha zeka ahamysapybyitsa tsimykaranaha. Deus ahakyri humo batu iakparawy iwaze ityryktsa iharere bo batu h̃y zikaha, iwatsahi ahakyri byihuja.

²¹Iwaze ahasopyksapybyitsa tsimykaranaha tsmoewyhiknaha! Deus harere bo tsiwabynahaze hỹ tsimaha. Deus harere bo zuba tsimynakaranaha. Iharere humo mymyhyrinymyryky. Iharere humo tsimyzurukunaha zeka mysapyrētsa tsmoziknaha. Batu mysikyby Deus okzeka mysapyrētsa tsmoziknaha.

²²Deus harere tsiwabynaha zeka ana wa hi tsimykaranaha. Iharere bo yh̃ybyizeka tahaspihikbatakanaha zuba. ²³Asahi Deus harere piwabynaha zuba iwaze iharere bo batu ma zikaha. Asahi maku wata. Atakta moknywy bo atsoko iktsa niy. ²⁴Bykyze niparakze atsoko tahyrikoso humo nispiriktsoxda. Iwa kytsa Deus harere bo sisopyk.

Iharere bo atsoko ziwabynaha iwatsatu batu ma zikaha. Niahatsahi iharere humo nispiritsokdanaha. Maku atsoko moknywy bo iktsa niyze tawata tahyrikoso humo nispiriktsokda.

²⁵Utsa batu. Asahi iharere pinymyrykynaha. Deus wasania ty pinymyrykynahaze iharere bo kino mytsaty mykaranaha. Sakurētsa maha. Iharere humo ba zikspiritsokdanaha. Myzibyituhukutu iharere piwabykynaha. Iharere bo ma mykaranaha. Iharere humo myspirikporētsa. Wasani my. Ana humo hi simysapyrētsa moziknaha. Imysapybara humo ka batu h̄y zikaha. Deus zikwy ty mybo nyny my iwatsahi iharere bo hȳ tsimykaranaha. Iwatahi Deus myhumo tsakurēta mozik.

²⁶Deus harere bo ma ahabyizeka katsa tu tsimymyspihikbatakanaha. Aty iharere imysapybara ty motsasoko, anaharere tymoewy byizeka Deus humo ispirikpoziubyita. Taspihikbataka zuba.

²⁷Deus myzo my. Hawa tsimyzurukunaha nimyhyrinymyryky. Haramukuka tysipokzitsinaha. Sizotsa byitsa tysipokzitsinaha. Pykyhytutaha parakbaha harere humo pahamyiwykynaha batu ma ziky, anaharere Deus batu iakparawy. Siharere bo yh̄y ahabyizeka Deus pahabetesaka. Iwaze Deus:

— Wasani tsimaha. Kahumo ahaspirikporētsa babatsa tsimoziknaha — niy.

Parakbaha astsabani tsawatsa tysipokzitsikinahaktsa.

2 ¹— O katukytsa abaka ikiahatsa mypehakatsa Sesus tuktsa tsikyziknaha. Atahi imysapyrēnikita. Sesus humo ahamypokzitsiukrētsa. Sizubarētsa soho ty soso byitaha:

“O ta myhyrizikwani iwatahi mykparawy, usta myhyrizikwybyita iwaze batu mykparawy” — tsimy. Ana hi Deus humo batu imysapy. Parakbaha atsatu tsimaha! ²Tsinakypyknaha zeka maku tsinamyrēta mytsuk. Isuk tisapyrēta. Tsinaharēta. ³Ikiahatsa ja ihumo ahakparawy. Iwaze ikiahatsa tsinamyrēta pe:

— O myhyrizikwanita baze dyhyty idyhywy tisapyrēta! — tsimaha. Iwaze zikehe maku inamybyita niwatihi ahabo mynatsukze atahi isuksapybyita iwatsahi ihumo batu ahakparawy. Ikiahatsa inamybyita pe:

— O nabo sinamybyitsa baze tyk humo tu dyhytykta — tsimaha. Iwaze inamybyita humo batu ahakparawy. Batu imysapy tsimaha.

⁴Iwa tsimysiawatawyky, ikiahatsa estuba zuba maku humo wasani tsimykaranaha. Usta batu, meky watu tsimykaranaha. Isuk humo zuba meky watu ibo tsimykaranaha. Ikiahatsa ahanyhybyitsa tu isuk bo zuba iktsa tsimykaranaha anahi Deus okzeka batu imysapy tsimaha:

⁵O katukytsa kaharere bo wabyziutaha! Deus parakbaha sinamybyitsa nisiwatawy. Asahi Sesus tuktsa, iwatsahi Sesus harere bo hȳ

mykaranaha ihumo sispirikporêtsa iwatsahi Deus tyryktsa moziknaha. Asahi tahawahi ituk mynapykyryknaha. Deus tyryktsa tuze isapyrênikia ty sibo nyny my. ⁶Ikiahatsa hi sinamybyitsa tsimysisapybyrikinaha.

Sinamynikitsa hi myzahasapybyrikiknaha, maku kytsa harere wabytsa bo myzahaoktykynaha. ⁷Asa kino Sesus soho humo siharerewabymybarêtsa. Ikiahatsa Sesus tuktsa tsimaha. Sesus ahapehakatsa abazubata my. Batu aty tohi Sesus wata. Iharere bo zuba hyÿ tsimykaranaha. Asaktsa isoho humo zisapybyrikinaha, Sesus tuktsa zisapybyrikinaha iwatsatu sisapyrêtsa ahasopyk.

⁸Deus abazubata. Tspisapywykynaha zeka Deus harere bo hyÿ tsimykaranaha anaharere hi:

— Utsa parakbahatsa tysipokzitsiukuktsa awa humo tsinakara nahawa tihi ustsá kytsa tysipokzitsiki! — niy. Tubabatu ky tu anaharere ziwatahaka ana bo hi yhyÿ tsimykaranaha zeka tsipisapywykynaha. ⁹Ikiahatsa kytsa sisukziurêtsa tsimynasinyky nahaze ana humo hi batu ahamysapy tsimaha. Deus harere bo batu hyÿ zikaha, iwatsahi ahasikybyrêtsa tsimykaranaha.

¹⁰Taparakta Moises Deus harere pehawý ziwatahaka. Tszubarêna ziwatahaka. Katsa anaharere tszubarêna bo ma ahabyi zeka ahasikybyrêtsa tsmoziknaha. Deus harere humo yhyÿ ahabyitsa tu ahasikybyrêtsa tsimaha. ¹¹Iharere tihi:

— Mekta oke tatsa ba ziakse niy. Usa harere mekta ty kaba zikarapezenaha — niy. Ikia usta oke ty ykse byizeka wasani tsimy. Ikia maku tsipibeze zeka iwaze Deus harere bo batu hyÿ ziky. Iwatuze mekta oke batu ziakse Deus harere bo batu hyÿ ziky. Iwatahi asikybyrêta.

¹²Deus harere bo ma tahaktsa! Iwa tsimyzurukunaha zeka batu zimyinaha. Iwa tsimykaranaha zeka wasani my. Iwaze Deus batu mybo tyso:

— Batu ahamysapy tsimaha — my. Iwa wasani tsimyzurukunaha. ¹³Utsa kytsa ty isty pokzitsiu ahabyizeka Deus kino niwatihi ba zahapokzitsiu. Batu ahape — ahamysapyrêtsa — iwa batu tyso. Ikiahatsaktsa kytsa tsimysipokzitsikinaha zeka wasani tsimaha, Deus kino niwatihi pahapokzitsiki. Atahi ahape:

— Ikiahatsa wasani tsimykaranaha — my.

**Deus harere bo hyÿ tsimykaranahaze ihumo
ahaspirikporêtsa tsmoziknaha.**

¹⁴Katukytsa katsa kytsa bo tsimysipokzitsikinahaze Deus niwatihi mympokzitsiki. Katsa hi:

— Sesus humo mspirikporêtsa — tsimaha zeka nawa Sesus zikzuruku katsa kino niwatihi tsimyzurukunaha.

Katsa Sesus humo mospirikpo byizeka ba ituktsa zikaha. Sesus harere bo ma ahabyi zeka katsa Sesus tuktsa babatsa ba zikaha. Katsa tu tsimymspihikbatakanaha.

¹⁵Sesus tuktsa sisuk byizeka hawa tsimaha. Sesus tukza batu sidisahawky hawa tsimaha. ¹⁶Tsimytsasonaha zeka:

— O wasani my. Abahi wastuhu pahapokzitsikinaha. Ahasuk ty nyny maha. Ahadisahawy ty nyny maha iwatsahi mytsaty mytsaty byitaha — tsimaha iwa mybarapetu tsimykaranaha. Sisuk ty sibo nyny byizeka tsimytsasonaha zuba. Ahaharere batu imysapy tsimaha. Ikiahatsa Sesus tuktsa babatsa mytsaty ahabyitsa tsimykaranaha. Ikiahatsa hi sidisahawy humo nyny byizeka batu wasani zikaha. Ahasuk humo batu nyny byizeka batu wasani zikaha. Deus hi:

— Batu ahamysapy — my. Ikiahatsa ahadisahawy ty ahasuk ty iwa sibo nyny tahaktsa! ¹⁷Tsimytsasonaha zeka — Sesus harere bo hỹ tsimykaranaha ihumo myspirikporëtsa — iwaze kytsa humo batu ahamypokzitsiu asatu tahaspihikbatakanaha.

¹⁸Wastuhu mype:

— Ikiahatsa Sesus humo ahaspirikporëtsa iwatsahi Deus okzeka ahamysapyrëtsa tsimaha. Uta hi kytsa humo kamypokzitsiukrëta iwatahi Deus okzeka kamysapyrëta — my.

Utakta ipe my. Kytsa humo imypokzitsi byizeka, ustsá batu sihyrinymyry. Sihyrinymyry byizeka katsaktsa Sesus humo myspirikporëtsa tsimaha. Katsa Sesus tuktsa babatsa ahawatawybyitsa. Kytsa tsimysipokzitsikinaha zeka iwaze katsaktsa Sesus humo myspirikporëtsa ana humo hi aparakbaha sihyrinymyrëtsa. Iwa my.

¹⁹Deus babata estuba zubata tu. Ana humo hi ahahyrynymyrëtsa. Wasani tsimaha. Hyrikoso sapybaratsa kino niwatihí Deus estuba zubata tu sisopyk. Iwatsahi sipybyrëtsa mytydykyryknaha tu. Deus hi:

— Ikiahatsa batu ahamysapy — my iwatsahi sipybyrëtsa. Ana humo hi spiriktsokda spiriktsokda byitaha!

²⁰O tsiwakyirëta! Iwa tsimytsasonaha zeka Sesus humo myspirikporëtsa ja iwaze kytsa humo batu ahamypokzitsi asatu tahaspihikbatakanaha. Ikiahatsa Deus humo batu ahaspirikpo. Iwa pahawatawyhik.

²¹Abarão soho piwatawyky. Tubabatu Abarão Deus humo tispirikporëta ziknakara iwatahi iharere bo hỹ ziknakara, iwatahi tispirikporëta h̃y. Deus harere bo zuba hỹ ziknakara iwatahi zikzuruku. Abarão tatse ty para bete zihoeck. Siraratsa wezowy bete tatse zihoeck, iwatahi tatse ty Deus bo nyny niy. ²²Iwaze asiba tatse zibezetatu Deus zipéha tahi nikara. Abarão Deus harere bo hỹ ziknakara. Iwaze Deus Abarão pe niy:

— O wasani tsimykara. Kaharere bo hỹ zuba tsimykara — niy. ²³Deus ipe tu isopyk:

— Abarão kaharere humo tispirikporëta iwatahi “O atahi tsimysapyrëta my” Tatse asiba zibezetatu kaharere humo tispirikporëta — niy. Tapara Deus hi:

— O atahi kaharereziuwu niy. Abarão kaharere tsihokdaharēna iwatatu ma nikara — niy. ²⁴Deus mype my:

— Ikiahatsa ahamysapyrētsa tsimaha. Kahumo ahaspirikporētsa. Kaharere bo hỹ zuba tsimykaranaha zeka wasani tsimaha, iwa tsimyzurukunaha — mykara.

²⁵Iwaze Hahabe inarokotatsa. Atatsa kytsa iakparawy tatsa. Iwatatsa tu Deus humo tispirikporētatsa nikara. Atatsa Sosue tuktsa sisukparakatsa tawahoro eze nisiokpitsīhik. Sosue tuktsa Deus tyryktsa niaha. Asahi nisiokpitsīhikze. Bykyze usta ske bo nisiwatawyhik iwatsahi sisukyrytsa batu isty ba. Iwatahi Deus atatsa soho tihi nikara:

— Uta atatsa pibetsa. Atatsa wasani my — niy. Iwa atatsa zibetsa.

²⁶Katsa tsimhyrikosokdanahaze mynury wytykoke bo mytsahoroknaha. Myhyrizikararawyta meky botu tasapy. Ikiahatsa Deus harere bo batu h̃ ihumo batu ahaspirikpo. Iwatsahi ba ziktsasonaha:

— O katsakta Sesus humo myspirikporētsa — tsimaha. Iwaze sizubarētsa humo batu ahamypokzitsi iwa tsimykaranaha zeka mybarapetu tsimykaranaha. Deus harere bo ma ahabyi zeka iwatsahi batu ituktsa babatsa tsimaha.

Myharere nitsasoko.

3 ¹O katukytsa myharere soho motsaso. Hawa tsimytsasokonaha pykyhytutykta. Mysapybyitsa tsimykaranaha zeka Deus hi:

— Batu ahamysapy — my. Katsa parakbaha myzubabyitsa tu myharere piwabykynaha ana humo hi pimiyikknaha zeka batu isapy tsimaha. Ahahyrinymyrytsa tsimaha zeka sizubarētsa ahaharere piwabykynaha Deus hi:

— Ahamysapybyitsa tsimaha — my. Sizubarētsa humo hi tsipimiyikknaha. Iwatsahi sihyrinymyrykytsa batu sizuba.

²Natabyituhukutu tsipimiyikknaha. Myharere tisapyrēna zuba zeka iwaze katsa Deus harere bo hỹ tsimykaranaha, mysapyrētsa tsimoziknaha. Imysapybara ka batu mykparawy, wasaniha humo zuba tsimykaranaha.

³Pikuza bo mytsaty tsimaha. Pikuza sake zozowyty isake bo tsykyk tsimahaze. Iwatahi pikuza kino mytuk paikpa mykara. Hana bo tsimykuru tsihikknahaze kino mytuku mokuru iwatsahi isakizozowy isake eze tsykykby tsikaha. Mystīazik isakizozowy hyrity wata.

⁴Tsaraha puētsikbyita bo mytsaty tsimaha. Tsaraha puētsikbyita zopok humo mokuru. Iharazozikwy humo mokuru. Hana bo iharazozikitsa mozihik na ha bo hi zuba tsaraha mokuru. Iharazozikwy humo hi mokuru. Mystīazik iharazozikwy hyrity wata.

⁵Iwatatu mystīazik tsikaeni tsibik tsizubarēna ihumo tsimytsasoikknaha. Nanabyi tsimytsasokonaha batu pyk zikaha.

Mystiazik izo waha. Izo tsikaeni niahatu zuba waratok humo mynapokze mokorobaik. Izo tsikaeni zuba iwahatu mynapokbaik. ⁶Mystiazik niwatihi. Mystiazik izohyritywa. Mystiazik humo tsimypamykysokonaha. Tsimysapybyrikinahaze batu imysapy tsimaha. Katsa izo hyritywaha tsimaha. Izo mokorobaikze hwitsa morõktsironaha. Batu sapy my. Myharere ty sizubarẽtsa tsipimyikiknaha zeka batu imysapy tsimaha. Satanas humo myharere pisapybyriki. Zikzibytuhukutu ihumo tsimysapybyrikinahaze Satanas harere bo yhỹ tsimykaranaha. Iwa katsa mystiazik humo tsimykaranaha. Mystiazik tsikaeni tsibik ihumo amy ty batu sapy tsimykaranaha.

⁷Parakbaha kytsa siraratsa, sisarakatsa pyryhyktsa, piknutsa iwatsa meky meky watu mykaranaha mysipyknaha myraratsa niyziknaha. ⁸Mystiazik batu. Batu aty tohi taharere meky watu batu ziky. Hawa ha ty batu sapy tsimypamykysokonaha batu pyk zikaha. Hawa ha ty batu mykparawy ana hi tsimytsasokonaha. Myharere batu sapy tsimaha, pyryhyk itsapyrita mymyborozik tawata. ⁹Katsaktsa Deus bo tsimypamykysokonaha:

— O Deus myzo ikia hi tsamysapyrẽta — tsimaha. Kyze kytsa soho tsiksihareresapybyrikinaha. Asaktsa parakbaha Deus nisisukni tahyritywatsa nisisukni ba zik sisoho metunaha. Myharere parakbaha soho tsipamykysokonaha batu ahamysapy tsimaha. ¹⁰Mysakeze tuk petok harere tsimypamykysokonaha. Deus tsimysapyrẽta tsimaha. Kytsa soho batu simysapy tsimaha niwatihi. Niwazubaktsa!

O katukytsa ahaharere humo batu wasani zikaha. Petok myharere zikahabyitsa. Tisapyrẽna zuba tsimypamykysokonaha. ¹¹Niwazubaktsa. Pihik pupuputsa titsaracrẽna, usa pihik titsiksipiarẽna ba zikaharapekyky. Batu zikaha.

¹²Katukytsa umaha hara meky watu ba ziktahara, duabohotsa haratsa meky watu ba ziktahara. Ba hawa tohi zikaha. Iwaha hi pihik kino. Pihik titsaracrẽna pihik titsiksipiarẽna pupuputsa eze atsatu batu myzizo. Iwatsahi petok myksoho ba zikpamykysonaha! Tisapyrẽna ty zuba tsimypamykysokonaha.

Myhyrinymyrywy baba.

¹³Aty ahabaze ihyrinymyryta babata iharekykarabyita zeka atakta ba ziktaso:

— Uta zuba kahyrynymyrẽta — baziky. Ata zuba ustsá bo mysisapywyky iwaze ihyrynymyrynikita mysiwatawyky. Iwaze kytsa isoho motsasokonaha:

— O atakta ihyrynymyryta babata — mykaranaha. ¹⁴Ahazokzirẽtsa tsimaha zeka mybarapetu ahasopyk, ahyrynymyrybyita babata. Ikiá mytsaty tsimyzeke:

— Uta zuba kahyrinymyrëta hawa mytsaty tsimyzeka wasani my — mybarapetu tsimaha. Ahabo zuba mytsaty tsimykaranaha zeka Deus humo batu ahaspirikpo. Ahaspirikpobyitsa tsiksispihikbatakanaha. ¹⁵Iwahatu tsimyzurukunaha zeka Deus harere bo batu hÿ zikaha. Mybarawy ezektsa harere bo zuba tsiwabykynaha, siharere bo zuba hyÿ tsimykaranaha. Hawa haty Deus hyrikoso pahahyrinymyryky batu hÿ zikaha. Anahi Satanas hyrikoso sapybara pehatsa iharere bo yhÿ tsimykaranaha.

¹⁶Iwatsahi batu ahasapy tsimaha, ahazokzirëtsa. Ahasoho bo zuba mytsaty tsimykaranaha. Ahamysapybyitsa tsimykaranaha. Tsiplikohometukunaha iwatsahi paikpa mytsaty tsimykaranaha. Iwaze batu ahamysapy tsimaha. Ahamysapybyitsa tsimykaranaha.

¹⁷Ahahyrinymyrywy tuze Deus harere bo zuba hyÿ tsimykaranaha. Tisapyrëna ty tsimyzurukunaha zeka ihumo ahamysapyrëtsa tsimoziknaha. Ahaharesapyrëtsa tsimoziknaha. Kytsa tuk ahakurëtsa. Ahakyribyitsa. Mypehakatsa harere bo hyÿ tsimykaranaha. Batu mybarapetu ahasopyk. Sizubarëtsa batu mysimyiki. Tyharape pokzitsiukuknaha. Batu metutu zikaha. Tsimymysapywykynaha zeka ba ziktsaso:

— O katsa zuba mysapyrëtsa tsimaha bazikaha — iwa tsimyzurukunaha zeka ahahyrinymyrywy baba tsimaha.

¹⁸Tohi kino sakyriukanikitsa mysiakusukniki mykara. Atahi maku mysiparikikze tawata. Mysiparikikta iwatahi taparikihitsa tapykynaha. Iwa maku kino sakyriukanikitsa bo mysiakusukniki iwatsahi sakyriukrëtsa meky wa tu moziknaha Deus okzeka simysapyrëtsa moziknaha.

Sispirikpobyitsa tuk batu mynapykyryk.

4 ¹Natabyituhukutu hawa ha ty tsimyzihikiknaha anahi tsimaha iwa tsimyzurukunaha. Ikiahatsa ahahumo zihika ty zuba ahasopyk. Utsa bo batu mytsaty zikaha. Ahabo zuba mytsaty tsinakaranaha. Iwatsahi batu ahaharereziu. Tsisisohometukunaha paikpa mytsaty tsinakaranaha. ²Ahanamy tsipebyk tsihikiknaha. Inamy tsizubarëna ty batu itykse iwatsahi tahakyrikinaha. Ikiahatsa ahanamy bo zuba mytsaty tsimykaranaha. Iwatsahi ustsasinasisykyrykynaha iwaze sinamy takse tsimykaranaha. Utsa kytsa namy tsiipiaksekyzykynaha. Iwaze tsahasakparëtsa tsimykaranaha. Ahatuk zuba betsak tsimykaranaha. Batu ahanamyky tsimaha. Ahanamybyitsa tu Deus bo batu sapyky zikaha.

³Ikiahatsa Deus bo ahanamy humo tsimyzapykykynaha zeka ahabo batu nyny my.

— Amo skaraba Deus batu mybo nyny ziky — tsimaha. Deus ahabo nyny byizeka iwatahi ahamysapybyitsa humo tsimaha. Tsimyzapykykynahaze ikiahatsa tihi:

— O amy ty batu sapy my — tsimaha. Iwaze Deus ahabo batu nyny ziky. Deus harere bo batu hỹ tsimaha, ahanamy tsizubarēna tsimyzihihiknaha, iwaze ahabo zuba tsimykarana. Hawa Deus ahahumo mozihihik batu mytsaty tsimaha.

⁴Ikiatsa wytyk hyritywatsa. Atatsa hi tabarikta zereke iwaze usta tuk tasapy. Iwa ikiahsa kino Deus tserekeknaha usts kytza bo tsimykurunaha. Sizubarētsa Deus humo batu siakparawy, iharere humo batu hỹ zikaha. Asahi zuba ikiahsa ahakparawytza ahatuktsa moziknaha. Iwatsahi iwa tsimykarana zeka sizubarētsa tahakryrikinahatsa watsa tsimoziknaha. Ahatuktsa asahi Deus humo batu siakparawy iharere humo batu hỹ, ikiahsa kino niwatihi Deus humo takyriukinahatsa watsa tsimoziknaha. Ahaharereziuwbyitsa tsimoziknaha.

⁵Deus harere papeu humo tubabatu ziwatahaka. Deus hyrikoso mytuk mynapykyryk. Myhumo tsimypokzitsiarēta. Iharere bo hyỹ tynakaranahaktsa! Deus harere bo hyỹ ahabyi zeka Deus hyrikoso myhumo batu iaku. Iwa tubabatu papeu humo ziwatahaka. Anaharere batu waby tsimaha.

⁶Deus myhumo tsimypokzitsiarēta. Myzibytuhukutu myhumo tsimypokzitsiukrēta. Deus harere tubabatu ziwatahaka. Atahi motsasoikik zeka. — Uta zuba wasani my — atahi Deus ykparawybyita. Atakta Deus bo mopamykysoikik zeka:

— O Deus tsiktsumuēhĩ my — iwa Deus mypehakatsa mozik hỹ. Atahi Deus iakparawy.

⁷Deus harere bo hyỹ tsimyzeka Satanaharere humo batu hỹ tsimy. Satanaharere bo batu hỹ ahabyi zeka ata kino ahapokso moparakik.

⁸Deus pauk baze tu tsimypykyknaha zeka ata kino niwatihi ahatuk mynapykyryk. Iwa tsimyzurukunaha. Mysapybara tsimoewynaha. Hawa ha ty wasani tsimykarana. Batu tahapetu ahasopyk:

— O Deus atatu ja icy batu kahyrinymyry — iwa mytsaty mytsaty byitaha. Iwa mytsaty ahabyizeka Deus tuktsa babatsa tsimoziknaha.

⁹Tsimysapybyitsa tu tsimykarana zeka iwatsahi ahasukatsihikrētsa tsimoziknaha. Kazi tsimykarana. Typuziukunahaktsa. Ahakubyitsa tu ahamysapybara humo pyktaha. Ahamysapybyri humo Deus okzeka ahasukatsihikrētsa za. ¹⁰Deus pe tsimaha:

— O katsa mybo tymytsumuēhikta tsimaha. Iki zuba tsahyrinymyrēta katsa batu myku katsa mysapybyri humo iwatahi tymytsumuēhĩ — tsimaha. Iwaze Deus ahahumo yhỹ mykara. Atahi pahatsumuēhĩ hỹ.

Myharere soho.

¹¹O katukytsa usts kytza soho ba ziksisohometunaha! Ahatukytsa soho tsimykarana zeka Deus harere humo tsimyspiriktsokdanaha. Tsimytsasokonaha zeka:

— O katukytsa ikiahatsa batu wasani zikaha — tsimaha.
Tahaspihikbatakanaha.

O Deus harere batu isapy tsimaha. Deus harere myhumo tsikaeni zuba kakparawy, iwatahi mybo awatu. Deus harere batu ahakparawy tsimaha iwatsahi tsimysapybyrikinaha. ¹²Iwa Deus wata tsimaha, Deus zuba tsihyrinymyrêta, atahi mypehakatsa. Hawa mytsaty tsinakaranaha ana humo hi tsihyrinymyrêta. Deus zuba kytsa bo motsaso simysapyrêtsa pe:

— Ikiahatsa tsahamsapyrêtsa my pahatsumuêhĩ kazikwy ty ahabo nyny my — niy. Kyze simysapybyikitsa pe:

— O ikiahatsa batu ahamysapy iwatsahi tsimyhyrikosokdanahaze batu katuk tsimynapykyryk — my. Iwaze batu tyso ahatukytsa pe:

— O ikia batu amysapy — tsimaha. Deus zuba tsihyrinymyrêta babata aty tsimysapyrêta tsihyrinymyrêta. Aty imysapybyita tu ana humo kino niwatihi tsihyrinymyrêta. Iwaze kytsa soho ty batu tyso ikia batu amysapy. Ikiahatsa ahahyrinymyry byitsa iwatsahi ahatukytsa soho ba ziktsaso.

Byriri sa hawa tsimaha.

¹³O katukytsa wabytoktotaha! Ikiahatsa zuba tsimypamykysokonahaze:

— O katsa myhyrinymyrêtsa iwatsahi: “O kytsa ustsá hudikhudikwy boktsa! Anaeze estuba taytyktsehe. Mynamy tabiak! Okryrsaro tsizubarêna takse hÿ” — tsimaha. Iwa tsimypamykysokonaha.

¹⁴Katsa byiri ky soho humo batu myhyrinymyry. Tozeka ja byiri mybo tisapyrêna hawa. Tozeka ja mybo batu isapy. Katsa batu myhyrinymyry hÿ. Hawaze tsimyhyrikosokdanahaze katsa batu myhyrinymyry. Katsa bijo zatata hyritywaha. Haramwe mynaharamweze bijo zatata myokzubaik. Katsa kino niwatihi aibatohi tsimyhyrikosokdanaha. Hawaze batu ahahyrinymyry. Bijo zatata batu mopykyryk, katsa kino niwatihi mybarawy eze ba zikakpykyryknaha mohyrikosokdanaha.

¹⁵Iwatsahi asa zuba tsimypamykysokonaha:

— O Deus mozihihik zeka katsa ba zikyrikosokdanaha my. Byriri usa hudikhudikwy bo tsimaha. Deus mozihihik naha humo zuba tsimykurunahaktsa! Deus mozihihik naha humo zuba anaeze mynamy tabiak okryrsaro takse — iwa tsimypamykysokonaha. ¹⁶Iwaze ikiahatsa mytsaty tsimaha zeka: — O katsa zuba myhyrinymyrêtsa— iwatsahi hawa tsimypamykysokonaha, atsatu tsimykaranaha. — Katsaktsa myhyrinymyrêtsa — iwa mytsaty ahabyitsa tsimykaranaha. Hawa ha ty Deus mozihihik ikiahatsa batu ahahyrinymyry, ahasoho zuba tsimyzihikiknaha. Batu wasani tsimaha.

¹⁷Aty hawa ha ty tsimysapyrêna ty zinymyryky zeka batu ziky iwatahi isapybyriki. Deus ipe my:

- Ikia batu amysapy — niy. Katsa hi:
 — Hawa ha ty wasani tahaktsa kytsa! — tsimaha.

Sinamyrëtsa soho motsasoko.

5 ¹O sinamyrëtsa wabytaha! Abaka ahanamy zuba. Iwaze hi sinini tsimykaranaha. Iwatsahi tsimopuziukunaha. Kadi tsimykaranaha! ²Ahanamy atsoko mohokda. Ahanamy tsipokzitsarëna ka mobibiba. Wazazatsa ahasuk piokbaiknaha. ³Ahanamy mosysybaik. Ahaokyrysaro ouro parata iwa zikarabaik, nioktsirörö. Ahanamy zozo tsikaha. Usta kytsa ahaokyrysaro niworobaik mokozoneha zeka asa hi:

— O atahi tisorekrëta, tanamy zizozoko zuba iwatahi batu iaku mynakara — mykaranaha. Jokboha kyritut tu ahanamy mokoroba iwaze ba zinyzoneha. Izowaha, katsa izo humo sinini tsimaha. Tahanamy zuba zozo tsikykaranahaze Deus pahasininiwyky. Iwaze Deus ape my:

— Ikia batu amysapy — my.

⁴Kytsa awaratok eze tarabaja ziknakaranahaze okyrysaro ty batu sibo nyny tsikaha. Wabytaha! Deus bo zahasohokonaha, ikia humo tahokanikinaha. Deus zikwyrënikita mysiwabyky. Atahi siharere ziwaby. Asahi awaratok eze tarabaja nikaranaha batu okyrysaro humo. Deus pe niaha:

— O Deus bjoikpe ezekta inamyrënikita mybaze myhyriziktsokzawy humo batu okyrysaro ty mybo nyny ziky — niaha. Iwatsahi mynamybyitsa sinini tsikykaranaha. Ikiahi inamyrënikita humo sininiwyky hawa katsa mywatsa sinini my iwa tsimy. Ikia hi mypehakatsa my. Asahi bjoikpe ezekta, asahi mybarawy ezektsa humo niwatihi ikia zuba abazubata my niaha. Iwaze Deus tihi:

⁵O sinamynikitsa ikiahatsa mybarawy eze tuze ahanamyrëtsa. Ahanamy humo ahakurëtsa. Hawa ha humo ahakparawy zeka atsatu tsiapiksenaha. Ahadisahawy tisapyrëna ty zuba tsizadisahanaha. Abaka meky watu. Deus ahape:

— Ikiahatsa sinini ykarawy boktsa! — my. Anabo hi pahasininiwy.

⁶Ikiahatsa batu wasani tsimykaranaha. Wastuhu wasani mykaranahatsa sihumo tsiksisapybyrikinaha. Wastuhu simysapyrëtsa ziknasibakanaha, iwa tsikykaranaha. Asahi zikahabyitsa tu iwaze ikia tsiksibanaha. Iwaze Deus sinamyrëtsa sinini ykarawy bo mysipehahik.

Deus bo tsimypamykysokonaha ana humo tsakubyrisorokrëtsa.

⁷Iwaze ahakubyrisoroku ja! Sesus myziksizonaha taperyky, iwatsahi ahakubyrisorokuja. Sesus taperykykta kytsa! Ikiahatsa hi waratok tsihitsa wata tsipiperykynaha. Atahi wihara piperyky. Tapara hyritsik tapery. Hyritsik mynawöze mysiparik. Wihara mytahaaze niwatihi hyritsik nawözo. Iwa waratok tsihitsa piperyky my, tsiakubyrisorokrëta.

⁸ Ikiahatsa iwatsa tsimoziknaha. Ikiahatsa kino niwatihi Sesus myziksizonaha tsipiperykynaha. Ihumo tsiperykynahaze Sesus mozumuzo naha jokboha. Iwatsahi ihumo ahaspirikpotohi ahapunihikrêtsa. Batu ahaku. Sesus myziksizo hỹ.

⁹ O katukytsa ahatuk zuba awatutaha! Tsimyhapesapybyiknaha zeka Deus hi:

— O ikiahatsa batu wasanibyitsa ahamysapybyitsatu tsimykaranaha — my. Kyze zikiehe jokboha kyritik tu myziksizo. Kytsa simysapybyitsa Deus ispe my:

— Batu wasani tsimaha — my. Katsa myty ykso ykso byitaha. Myty betsak betsak byitaha iwaze Deus hi:

— O ikiahatsa ahamysapyrêtsa — my.

¹⁰ — O katukytsa Deus sohokotsa mytsaty tsimaha! Niakbanahatsa bo mytsaty tsimaha! Tubabatu asahi Deus harere ziknatsasokonaha. Asahi kytsa sizubarêtsa Deus harere humo sispirikpobyitsa asa humo hi sinini nikaranaha. Sinini nikaranahaze iwatsatu Deus humo sispirikpotohi ziknakaranaha. Ikiahatsa hi siwatsa tsimyzurukunahaktsa kytsa! Iwatsatu sinini tsimykaranaha Deus humo ahaspirikpotohi — my. ¹¹ Katsa Deus sohotsitsa soho:

— O sipunihikrêtsa hỹ niaha — tsimaha. Mytsatyziu tsimykaranaha! Taparakta So sinini ziknakaraze tybyiri zuba ziknakara. Deus ziktsumuêhikĩ. Tapara So tanamy zihokzabaik, inamy hana bo ja. Iwatatu Deus humo nispirikpotohi atahi pe:

— O Deus wasani my — nikara. Iwaze Deus ustsá namy ty ibo nyny niy. Iwa mypehakatsa ihumo tsimypokzitsiukrêta. Atahi mymypokzitsiki. Myhumo tsimypokzitsiarêta niwatihi.

¹² Aba usa harere my. Wabyziutahaktsa katukytsa! Hawa ha ty wasani zuba tsimytsasokonaha. Ahaharere wasani byizeka Deus hi:

— O ahaharere batu imysapy — my. Myzibiyituhukutu hawa ha ty wasani zuba tsimytsasokonaha. Batu tyso — O aba kaharere tisapyrêna my. Deus okzeka kaharere wasani my. Atahi mybarawy nizukni iokzeka kaharere wasani my. Tisapyrêna my. Atahi bijoikpe nizukni iokzeka kaharere tisapyrêna my tsimaha — iwa ba ziktsaso. Usta tsyhyryze tsipitsumuêhĩ tsihik zeka ikia hi:

— O patsumuêhĩ — tsimy. Atsatu tsimy. Usta tsyhyryze amy tsumuêhĩsihik byizeka ikia hi: — O ba zatsumuêhĩ — tsimy. Ity batu tsumuêhĩ. Iwaze ba ziktsaso — Deus okzeka kaharere tisapyrêna — my. Hawa tsipihareresoko atsatu tsimykara. Iwa tsimyzurukunaha zeka Deus batu pahasininiwyky.

¹³ Kyze ikiahatsa baze aty sinini mykara zeka Deus bo tsimypamykysonaha.

— O tyziktsumuêhikta tsimy — tsimaha. Ikiahatsa baze aty tsakurêta zeka Deus bo tsimysakibaziknaha iwatahi:

— O Deus ikia hi tsamysapyrêta — tsimaha.

¹⁴Ikiahatsa tuk aty tsimyitsapyrêta zeka Sesus tuktsa asahi myspirikpokotsa mysihuahuaka!

— Mywahoro bo paku tynahaktsa — tsimaha. Myzumunahaze itsyhyryze Deus bo mopamykysonaha. Imyitsapyrita pizororowy ana hi Deus bo myzapykykynaha. Imyitsapyrita harek humo itutawy ty su maha, iwaze Deus pizororowy. Asa hi:

— Mypihakatsa Sesus humo myspirikporêtsa iwatsahi ihumo itutawy ty aharek bete su tsimaha — maha. Iwa tsimykaranaha. ¹⁵Iwaze Deus bo myzapykykynahaze Deus pizororowy. Kytza Sesus humo sispirikpotsa babatsa Deus pizororowy. Iwaze imysapybara ty nikara zeka Deus piokzohik. Iwa imyitsapyrita tsakurêta mozikzo.

¹⁶Iwatsahi imysapybara ty tsimykaranaha zeka ustsas Sesus tuktsa bo tsimypamykysokonaha. Ahapetuk typamykysokonaha. Iwaze Deus hyrikoso myzahakse mysapyrêtsa tsmoziknaha. Iwatahi Deus mympokzitsiki pisikybybyriwyky. Iwa tsimyzurukunaha zeka wasani tsimaha. Deus zikwy ahabaze mynapykyryk. Tsimyzapykykynaha humo izikwy ahatuk mynapykyryk. Ahamysapyrêtsa tsmoziknaha.

¹⁷Taparakta Erias mywata. Erias Deus bo ziknapamykysoikik. Tubabatu Erias atatuze Deus bo nipamykysoziuku:

— O Deus hyritsik ty ka zâk zâkbyity! — niy. Ba ziknawõ. Deus iharere ziwabyze iwahi batu hyritsik ziknawõ. Harakykbyihi nityktseheze hyritsikbara. ¹⁸Bykyze Deus bo nipamykysokoze:

— O Deus hyritsik mybo tyziwõkta! — niy. Hyritsik nizapykykyze Deus ziwaby. Hyritsik nawõzo hÿ. Wytyk wihara taharazoze zibakaranaha. Iwa ikiahatsa Erias watsa tsimahaktsa! Ikiahatsa Deus bo tsimypamykysonaha. Amy skaraba Deus bo tsimyzapykykynahaze ana hi tsipiperykynaha. Ihumo ahaspirikporêtsa babatsa iwa amy ty tsimyzapykykynaha atsatu Deus ahabo nyny my.

¹⁹O katukytsa! Aty ahatuk Deus harere tsikaeni zuba iakparawy iwatahi pimyiki iwa zeka ikia ity tsipitsumuêhînaha. Ituk Deus bo tsimypamykysokonaha. Ikia tsimyzihikik:

— O atakta Deus harere bo yhÿ myzo zeka ba zimyi — iwatahi ikia Deus bo ituk tsimypamykysoko. Taharere ty wasani haty nikara Deus harere iakparawyo atakta tsimysapyrêta niyzikzo. ²⁰Iwaze atahi zimiyita zitsumuêhîkî Deus hi:

— Atahi wasani my. Tsiktsumuêhîkî iwatahi imysapybyita tu nikaraze piokzohik — my. Deus bo pioktyhyryk. Sinini ykarawy bo ba zikpeha. Imysapybyita tu nikaratatu piokzohik. — Ana bo hi mytsatziutahaktsa! tsimaha

Tsiaku niy